

gee par les Barbares. Et combien que tant de fois elle ayt esté prinse, & ruinee, elle est toutesfois encor'en pied, & a la Sainct siege Apostolique, ou sied le Vicaire, & lieutenant de Nostre Seigneur Iesus Christ, qui est a present pour ses merites Paul V. l'honneur, & Gloire du Pontificat.

Des feux des anciens, dont peu d'Autheurs ont escript, receuilliz de quelques fragmentz, & histoires.

DAultant que ceste matiere des feux n'a iamais esté traictée distinctement par aucun, nous en parlerons vn peu, si non avec briefueté, au moins le plus succinctement qu'il sera possible. Et d'aultant qu'il est difficile d'en donner quelque intelligence par les moyens qui nous sont incognuz, il est necessaire que nous ayons recours aux exemples modernes pour tirer vne plus grande intelligence, & capacite de la matiere.

Les Romains iugeant combien la flamme continuelle, & chaleur du feu, qui sort de la braize enflammee, estoit dommageable a la veüe, trouuerent vn fort bon remede.

Ilz cognurent après le danger qu'il y auoit de porter du feu d'vn lieu a l'autre, par les chambres, & maisons, par ce vous vous debuèz imaginer qu'ilz auoient l'entendement aussy ouuert, & industrieux comme nous aultres, dou ie viens a croire, qu'ilz cognoissoient aussy le peril, & danger qu'apportent les cheminees, qui ont esté inuentee par les modernes. Et nous mesmes auons veu brusler plusieurs maisons, meubles, richesses, & hommes pour s'estre allumè le feu a vne cheminee: & tous les iours nous touchons au doig le bruit, & dommage que causent telz accidentz pour le concours des gardes, & du peuple qui accourt au son du tocsin, a la meslee, & furie desquelz beaucoup de personnes ont esté volees, sous couleur de secours qu'on leur y vouloit prester.

Il y a encor aussy d'aultres façons de faire dommageables, & qui traient avec eux mille incouuenientz, comme sont les chaufferettes, vases, fourneaux, & aultres sortes de foyers portables. Car tantost les petitz tombent dessus, or font ilz des fumees ennuyeuses, & facheuses, qui gastent, & ruinent de si belles choses, noircissent les chambres, & bruslent les habitz du peril de leurs estincelles, & des charbons, qui causent a plusieurs